



*Ilinalathala ng Partido Komunista ng Pilipinas-Bagong Hukbong Bayan sa Rehiyong Bikol*

REBOLUSYONARYONG  
PANGMASANG  
PAHAYAGAN  
NG BIKOL

Espesyal na Isyu  
Enero 2006

## Misengkwentro ng mga Pulis at Militar, Tatlo ang Patay

**Enero 2** – Bandang alas-10 hanggang alas-11 ng gabi, nagbarilan ang mga pulis ng PNP-Matnog at mga elemento ng 2<sup>nd</sup> IB Philippine Army. Naganap ang insidente sa Brgy Bolo, Matnog, Sorsogon.

Ayon sa pagpapatotoo ng mga taumbaryong nakasaksi, dumating ang mga militar bandang alas sa isang gabi. Inokupa nila ang barangay health center. Bandang alas-10 ng gabi, dumating naman ang tropa ng PNP-Matnog na nasa pamumuno mismo ng chief of police nito. Pumwesto naman ang nasabing tropa sa kabilang dulo ng kalsada.

Ilang minuto lamang ang lumipas, nagkaputukan na ang dalawang grupo. Patay si Police Senior Inspector Eduardo Amande Jr, ang Chief of Police ng PNP-Matnog. Kasama rin sa namatay sina Pfc Alex Cortez ng 2<sup>nd</sup> IB PA at si CAA Roger de Leon. Dalawa pa ang sugatan na nakilalang sina Pfc dela Serna at PO2 Mancera.

Matapos ang pangyayari, agad na pinagtakpan ng mga opisyal ng militar at pulisya ang naganap na misengkwentro. Ayon sa interbyu kay PNP

Provincial Director Revilla ng Sorsogon, lehitimong engkwentro raw ang naganap sa pagitan ng mga elemento ng PNP-AFP, at ng New People's Army. Ito rin ang naging paliwanag ni Col Serrano ng 901<sup>st</sup> Infantry Brigade na nakakasaklaw sa 2<sup>nd</sup> IB PA.

Agad naman itong pinasubalian ni Ka Greg Bañares, ang tagapagsalita ng NDF-Bikol at ni Ka Roger Rosal, ang tagapagsalita ng CPP. Ayon sa paabot ng Celso Minguez Command ng NPA sa Sorsogon, walang anumang yunit ng NPA na malapit sa pinangyarihan nang maganap ang putukan.

Maaalalang may mga dati nang naganap na misengkwentro sa hanay ng mga kaaway na agad nilang pinagtakpan o kaya nama'y itinanggi. Noong Agosto ng nakaraang taon, pare-parehong elemento ng Regional Mobile Group ng PNP ang nagbarilan at nagpatayan sa kanilang kampo sa Pilar, Sorsogon. May naganap ding kaparehong insidente sa Castilla, Sorsogon noong 2005. Sa pagkakataong iyon mga CAFGU at militar naman ang nagbarilan sa Brgy La Union.

sundan sa pahina 2

Dati na ring ginagamit na dahilan ng mga kaaway ang diumano'y pagsalakay ng NPA sa kanilang tropa upang pagtakpan ang mga ganitong kapalpakan.

Ganito ang nangyari nang magkabarilan ang combined forces ng mga militar na nag-operasyon sa hangganan ng mga prubinsya ng Camarines Norte at Quezon noong Mayo 2005. Pitong militar ang patay at pito pa ang sugatan. Sa Globe cellsite naman sa Bacon, Sorsogon, nagbarilan din ang mga militar na nagbabantay rito. Isa sa kanila ang namatay. Upang itago ang ganitong kahihiyan, pinagbabaril ng natirang mga sundalo ang tower ng cellsite upang palabasing hinaras ito ng NPA.

Pinapakita ng mga ganitong insidente kung gaano kabuway ang disiplina, koordinasyon, at pangkabuuang chain-of-command ng reaksyunaryong sandatahang lakas. Ngunit higit pa rito, pangunahing nagiging biktima ng ganitong kapabayaang mga karaniwang sundalo at kanilang pamilya. Walang dangal ang kanilang pagkamatay sa mga labanang dulot ng kapalpakan sa koordinasyon ng kanilang mga opisyal. Maliban pa, ikinakaila sa kanilang mga pamilya ang katotohanan ng kanilang pagkamatay.

Hindi nakapagtataakang nagkakaroon ng malawakang demoralisasyon sa hanay ng mga CAFGU at karaniwang sundalo. Marami na sa kanila ang nag-AWOL. Ayon sa panawagan ni Ka Greg at ni Ka Roger, 'di hamak na mas makabubuti sa mga sundalo at CAFGU ng AFP na tuluyan nang iwanan ang kanilang trabaho, habang may pagkakataon pa. Balewala lamang ang kanilang mga buhay at kaligtasan sa kanilang mga opisyal, maging sa kanilang commander-in-chief na si Gloria Macapagal-Arroyo. S